

# চন্দ্রাবতী

(নয়ানচাঁদ ঘোষ প্রণীত)

## (১) ফুল-তোলা

“চাইরকোনা পুঙ্কুনির পারে পম্পা নাগেশ্বর।  
ডাল ভাঙ্গ পুষ্প তুল কে তুমি নাগর ॥”  
“আমার বাড়ী তোমার বাড়ী ঐ না নদীর পার।  
কি কারণে তুল কন্যা মালতীর হার ॥”  
“প্রভাতকালে আইলাম আমি পুষ্প তুলিবারে।  
বাপেত<sup>১</sup> করিব পূজা শিবের মন্দিরে ॥”  
বাছ্যা বাছ্যা<sup>২</sup> ফুল তুলে রক্তজবা সারি।  
জয়ানন্দ তুলে ফুল ঐ না সাজি ভরি ॥  
জবা তুলে চম্পা তুলে গেন্দা নানাজাতি।  
বাছিয়া বাছিয়া তুলে মল্লিকা-মালতী ॥  
তুলিল অপরাজিতা আতসি সুন্দর।  
ফুলতুলা হইল শেষ আনন্দ অন্তর ॥  
এক দুই তিন করি ক্রমে দিন যায়।  
সকালসন্ধ্যা ফুল তুলে কেউনা দেখতে পায় ॥  
ডাল যে নোয়াইয়া ধরে জয়ানন্দ সাথী।  
তুলিল মালতী ফুল কন্যা চন্দ্রাবতী ॥  
একদিন তুলি ফুল মালা গাঁথি তায়।  
সেইত না মালা দিয়া নাগরে সাজায় ॥

---

১ বাপ (কর্ককারক), ২ বাছিয়া বাছিয়া।

## (২) প্রেমলিপি

পরথমে লিখিল পত্র চন্দ্রার গোচরে।  
পুষ্পপাতে লেখে পত্র আড়াই অক্ষরে <sup>1</sup> ॥  
পত্র লেখে জয়ানন্দ মনের যত কথা।  
“নিতি নিতি তোলা ফুলে তোমার মালা গাঁথা ॥  
তোমার গাঁথা মালা লইয়া কন্যা কান্দিলো বিরলে।  
পুষ্পবন অন্ধকার তুমি চল্যা গেলে ॥  
কইতে গেলে মনের কথা কইতে না জুয়ায়।  
সকল কথা তোমার কাছে কইতে কন্যা দায় ॥  
আচারি <sup>2</sup> তোমার বাপ ধর্ম্মকর্ম্মে মতি।  
প্রাণের দোসর <sup>3</sup> তার তুমি চন্দ্রাবতী ॥  
মাও নাই বাপ নাই থাকি মামার বাড়ী।  
তোমার কাছে মনের কথা কইতে নাহি পারি ॥  
যেদিন দেখ্যাছি কন্যা তোমার চান্দবদন।  
সেইদিন হইয়াছি আমি পাগল যেমন ॥  
তোমার মনের কথা আমি জানতে চাই।  
সর্বস্ব বিকাইবাম <sup>4</sup> পায় তোমারে যদি পাই ॥  
আজি হইতে ফুলতোলা সাঙ্গ যে করিয়া।  
দেশান্তরি হইব কন্যা বিদায় যে লইয়া ॥  
তুমি যদি লেখ পত্র আশায় দেও ভর।  
যোগল <sup>5</sup> পদে হইয়া থাকবাম <sup>6</sup> তোমার কিঙ্কর ॥”

1 আড়াই অক্ষরে মন্ত্রের কথা অনেক প্রাচীন বাঙালা পুঁথিতেই আছে। ময়মনসিংহের গীতি-কাব্যগুলির মধ্যে অনেক জায়গায়ই আড়াই অক্ষরে লিখিত চিঠির কথা পাইয়াছি। অর্থ - অতি সংক্ষিপ্ত, 2 আচারপুত্র, নিষ্ঠাবান, 3 তুল্য, 4 বিকাইব, বিক্রীত হইব, 5 যুগল, 6 থাকিব।

### (৩) পত্র দেওয়া

আবে করে বিলিমিলি সোণার বরণ ঢাকা ।  
প্রভাতকালে আইল অরুণ গায়ে হলুদ মাখা ॥<sup>1</sup>  
হাতেতে ফুলের সাজি কন্যা চন্দ্রাবতী ।  
পুষ্প তুলিতে যায় পোহাইয়া<sup>2</sup> রাতি ॥  
আগে তুলে রক্তজবা শিবেরে পূজিতে ।  
পরেতুলে মালতীফুল মালা না<sup>3</sup> গাঁথিতে<sup>4</sup> ॥  
হেনকালে নাগর আরে কোন কাম করে ।  
পুষ্পপাতে লইয়া পত্র কন্যার গোচরে ॥  
“ফুল তুল ডাল ভাঙ্গ কন্যা আমার কথা ধর ।  
পরেত তুলিবা ফুল চম্পা-নাগেশ্বর ॥”  
“পুষ্প তোলা হইল শেষ বেলা হইল ভারি ।  
পূবেত হইল বেলা দণ্ড তিন চারি ॥  
আমারে বিদায় কর না পারি থাকিতে ।  
বসিয়ে আছেন পিতা শিবেরে পূজিতে ॥”  
“আজিত বিদায় লো কন্যা জনমের মত ।”  
চন্দ্রার হাতে দিল আরে সেই পুষ্পপাত ॥  
পত্র নাইসে<sup>5</sup> নিয়ে কন্যা কোন কাম করে ।  
সেইক্ষণ চল্যা গেল আপন বাসরে ॥

---

1 অরুণদেবের স্বর্ণ বর্ণ অভ্র (মেঘ) ভেদ করিয়া বিলিমিলি করিতেছে—তিনি হলুদ দ্বারা স্নাত হইয়া উদিত হইয়াছেন (বিবাহের সময়ে বর-কন্যারা হলুদ দ্বারা স্নাত হন) 2 পোহাইয়া, 3 অর্থশূন্য। বরঞ্চ ‘হাঁ’ অর্থে ব্যবহৃত, কথাটার উপর জোর দেওয়ার জন্য ‘না’ প্রযুক্ত হইয়া থাকে, 4 মালা গাঁথিবার জন্য, 5 পত্র হাতে লইয়া। নাইসে—নিরর্থ শব্দ “পত্র না লইয়া কন্যা কোন্ কাম করে” এই অর্থেই “পত্র নাইসে লইয়া কন্যা” ইত্যাদি ব্যবহৃত। ‘না’ ‘নাই’ প্রভৃতি শব্দগুলি অনেক সময় শুধু গানে ধূয়া টানিবার জন্য কিংবা পাদপূরণার্থ ব্যবহৃত হইয়াছে।

## (৪) বংশীর শিবপূজা, কন্যার জন্য বরকামনা

পুষ্পপাত বান্ধি কন্যা আপন আঙুলে।  
দেবের মন্দির কন্যা ধোয় গঙ্গার জলে ॥  
সম্মুখে রাখিল কন্যা পূজার আসন।  
ঘসিয়া লইল কন্যা সুগন্ধি চন্দন ॥  
পুষ্পপাতে রাখে কন্যা শিবপূজার ফুল।  
আসিয়া বসিল ঠাকুর আসন উপর ॥  
পূজা করে বংশীবদন<sup>১</sup> শঙ্করে ভাবিয়া।  
চিত্ত করে মনে মনে নিজ কন্যার বিয়া ॥  
“এত বড় হইল কন্যা না আসিল বর।  
কন্যার মঙ্গল কর অনাদি শঙ্কর ॥  
বনফুলে মনফুলে পূজিব তোমায়।  
বর দিয়া পশুপতি ঘুচাও কন্যাদায় ॥  
সম্মুখে সুন্দরী কন্যা আমি যে কাঙাল।  
সহায়-সঙ্গতি নাই দরিদ্রের হাল ॥”  
এক পুষ্প দিলে বাপে শিবের চরণে।  
ঘটক আইবে<sup>২</sup> শীঘ্র বিয়ার কারণে ॥  
আর পুষ্প দিল বাপ বড়ঘরের বর।  
“আমার কন্যার স্বামী হউক দেব পুরন্দর ॥”  
আর ফুল দিল বাপ কুলশীল পাইতে।  
বংশ বড় ভট্টাচার্য্য খ্যাতি রাখিতে ॥  
বর মাগে বংশীদাস ভূমেতে পড়িয়া।  
“ভাল ঘরে ভাল বরে কন্যার হউক বিয়া ॥”

১ বংশীবদনের পুরা নাম বোধ হয় ছিল বংশীবদন ভট্টাচার্য্য, ২  
আসিবে

## (৫) চন্দ্রার নির্জনে পত্রপাঠ

পূজার যোগার দিয়া কন্যা নিরালায় বসিল।  
জয়ানন্দের পুষ্পপাত যতনে খুলিলি ॥  
পত্র পইড়ে চন্দ্রাবতীর চক্ষে বয়ে পানি।  
কিবা উত্তর দিব কন্যা কিছুই না জানি ॥  
আর বার পড়ে পত্র চক্ষে বয় ধারা।  
“এমন কেন হইল মন শূকের পিঞ্জরা ॥<sup>1</sup>  
দেখি শূনি সেই ভাল ফুল তুল্যা আনি।  
বয়স হইয়াছে এখন হইলাম অরক্ষীনি ॥  
জৈবন আইল দেহে জোয়ারের পানি।  
কেমনে লিখিব পত্র প্রাণের কাহিনী ॥  
কিমতে লিখিব পত্র বাপ আছে ঘরে।  
ফুল তুলে জয়ানন্দ ভালবাসি তারে ॥  
ছোট হইতে দেখি তারে প্রাণের দোসর ॥  
সেই ভাবে লেখে কন্যা পত্রের উত্তর ॥  
“ঘরে মোর আছে বাপ আমি কিবা জানি।  
আমি কেমনে দেই উত্তর অবলা কামিনী ॥”  
যত না মনের কথা রাখিল গোপনে।  
পত্রখানি লেখে কন্যা আতি সাবধানে ॥  
চন্দ্রসূর্য্য সাক্ষী করি মনের দিকে চাইয়া।  
জয়ানন্দ মাগে বর<sup>2</sup> ধন্য সাক্ষী দিয়া ॥  
শিবের চরণে কন্যা উদ্দেশে করে নতি।  
পত্র পাঠাইয়া দিল কন্যা চন্দ্রাবতী ॥  
পুষ্প তুলিতে কন্যা আর নাহি যায়।  
এই মতে সুখে দুঃখে দিন বইয়া যায় ॥

1 আমি পিঞ্জরাবদ্ধ শূকের মত, আমার মন এমন হইল কেন?,

2 জয়ানন্দকে বরস্বরূপ পাইতে প্রার্থনা করিল।

## (৬) নীরবে হৃদয়-দান

বাড়ীর আগে ফুট্যা রইছে চম্পা-নাগেশ্বর ।  
পুষ্প তুলিতে কন্যা আইল একেশ্বর ॥  
“তোমারে দেখিব আমি নয়ন ভরিয়া ।  
তোমারে লইব আমি হৃদয়ে তুলিয়া ॥  
বাড়ীর আগে ফুট্যা আছে মালতী-বকুল ।  
আংল ভরিয়া তুলব তোমার মালার ফুল ॥  
বাড়ীর আগে ফুট্যা রইছে রক্তজবা-সারি ।  
তোমারে করিব পূজা প্রাণে আশা করি ॥  
বাড়ীর আগে ফুট্যা রইছে মল্লিকা-মালতী ।  
জন্মে জন্মে পাই যেন তোমার মতন পতি ॥  
বাড়ীর আগে ফুট্যা রইছে কেতকী-দুস্তর <sup>১</sup> ।  
কি জানি লেখ্যাছে বিধি কপালে আমার ॥”  
এইরূপে কান্দে কন্যা নিরালা বসিয়া ।  
মন দিয়া শুন কথা চন্দ্রাবতীর বিয়া ॥

## (৭) বিয়ার প্রস্তাব ও সম্মতি

একদিন ত না <sup>২</sup> ঘটক আইল ভটাচার্য্যর বাড়ী ।  
“তোমার ঘরে আছে কন্যা পরমা সুন্দরী ॥  
কুলে শীলে তুমি ঠাকুর চন্দ্রের সমান ।  
না দেখি এমন বংশ এথায় বিদ্যমান ॥  
বয়স হইল কন্যা রূপে বিদ্যাধরী ।  
ভাল বরে দেও বিয়া ঘটকালি করি ॥”  
“কেবা বর কিবা ঘর कह বিবিরণ ।  
পছন্দ হইলে দিব মনের মতন ॥”

---

১ প্রচুর, অনেক, ২ একদিন তো ।

ঘটক কহিল কথা “সুন্দা<sup>১</sup> গ্রামে ঘর।  
চক্রবর্তী বংশে খ্যাতি কুলিনের ঘর ॥  
জয়ানন্দ নাম তার কার্তিক কুমার।  
সুন্দর তোমার কন্যা যোগয় বর তার ॥  
দেখিতে সুন্দর কুমার পড়িয়া পণ্ডিত।  
নানা শাস্ত্র জানে বর আতি সুপণ্ডিত ॥  
সূর্যের সমান রূপ বংশের দুলাল।  
সুখেতে থাকিব<sup>২</sup> কন্যা জানি চিরকাল ॥  
পশ্চিমাল<sup>৩</sup> বাতাসে দেখ শীতে লাগে কাটা।  
এখন ধইরাছে দেখ মধ্যি গাঙ্গে ভাটা ॥  
আম গাছে নয় পাতা ধরিয়াছে বউল।  
এই মাসে বিয়া দিতে নাহি গণ্ডগোল ॥”  
করকুষ্টি বিচারিয়া সম্বন্ধ মিলায়।  
ভালা বরে কন্যা বিয়া দেওয়া বড় দায় ॥  
কুষ্টি বিচারি কৈল “সর্ব সুলক্ষণ।  
বরকন্যার এমন মিল ঘটে কদাচন<sup>৪</sup> ॥  
কুষ্টিতে মিলিছে ভাল যখন এই বরে।  
এই বরে কন্যাদান করিব সুস্থরে<sup>৫</sup> ॥”

### (৮) বিবাহের আয়োজন

সম্বন্ধ হইল ঠিক করি লগ্ন স্থির।  
ভাল দিন হইল ঠিক পরে বিবাহের ॥  
দক্ষিণের হাওয়া বয় কুকিল করে রা।  
আমের বউলে বস্যা গুঞ্জে ভ্রমরা ॥

---

১ সুন্দা নদীর তীরে এই গ্রাম ছিল, ২ থাকিবে, ৩ পশ্চিম দিকের,  
৪ কদাচিৎ, ক্ৰটিৎ, ৫ নিশ্চয়

নয়া পাতা যত গাছে নয়া লতা ঘিরে ।  
ভাল দিন ঠিক হইল শঙ্করের বরে ॥  
সেই ত দিনে হইব বিয়া সর্ব সুলক্ষণ ।  
পানখিল<sup>1</sup> দিয়া করে বিয়ার আয়োজন ॥  
পাড়ার যতেক নারী পান খিলায়<sup>2</sup> ।  
যতেক নারীতে মিলি তার গান গায় ॥  
জয় জুকার গীত আর বাজে ঢুল<sup>3</sup> ।  
উঠানে আকিল কত নানান জাতি ফুল ॥  
আর্ঘিয়া পুছিয়া সবে পানখিল দিয়া ।  
আয়োজন করে সবে উতযোগ হইয়া ॥  
বিবাহের যত কিছু করে আয়োজন ।  
যতেক দেবতাগণের করিল পূজন ॥  
পূজিল শঙ্করে আগে দেব অনাদি ।  
অন্তরে যাহার নাম রাখিয়াছে বাধি ॥  
একে একে কৈল পূজা যত দেব আর ।  
শ্যামাপূজা একাচুড়া বনদুর্গা মার ॥  
আদিবাস হইল শুভ বিয়ার পূর্বদিনে ।  
ক্রিয়াকাণ্ড আদি যত হইল সুবিধানে ॥  
চুরপানি ভরে সবে উঠিয়া প্রভাতে ।  
গীত জুকার যত হইল বিধিমতে ॥  
আব্যধিক<sup>4</sup> করে বাপে মণ্ডপে বসিয়া ।  
তার মাটি কাটে যত সধবা মিলিয়া ॥  
সেই না মাটিতে ইটা তৈয়ার করিয়া ।  
পঞ্চ নারী মিলি দিল তৈল লাল দিয়া ॥  
অব্যধিক হইল শেষ জানি এই মতে ।  
সোহাগ মাগিল আর মায় বিধিমতে ॥

---

1 পানের খিলি, 2 পানের খিলি তৈয়ার করে 3 ঢোল, 4  
“আভ্যুদয়িক” শ্রাদ্ধ



আগে চলে কন্যার মায় ডালা মাথায় লইয়া ।  
তার পাছে কন্যার খুড়ি লোটা হাতে লইয়া ॥  
তার পরে যত নারী গীত জুকারে ।  
সোহাগ মাগিল কত বাড়ী বাড়ী ফিরে ॥

### (৯) মুসলমান কন্যার সঙ্গে জয়চন্দ্রের ভাব

পরথমে হইল দেখা সুন্দা নদীর কূলে ।  
জল ভরিতে যায় কন্যা কলসী কাকালে ॥  
চলনে খঞ্জন নাচে বলনে<sup>১</sup> কুকিলা ।  
জলের ঘাটে গেলে কন্যা জলের ঘাট লালা ॥  
“কে তুমি সুন্দরী কন্যা জলের ঘাটে যাও ।  
আমি অধমের পানে বারেক ফির্যা চাও ॥  
নিতি নিতি দেখ্যা তোমায় না মিটে পিয়াস ।  
প্রাণের কথা কও কন্যা মিটাও মনের আশ ॥  
পরকাশ কইরা কইতে নারি মনের কথা ধর ।  
তুমি কন্যা এই জগতে প্রাণের দোসর ॥”  
সরমে মরণ আইল কথা কওয়া দায় ।  
জলের ঘাটে গিয়া নাগর উকিজুকি চায় ॥  
লিখিয়া রাখিল পত্র ইজল<sup>২</sup> গাছের মুলে ।  
এইখানে পড়িব কন্যা নয়ন ফিরাইলে ॥  
“সাক্ষী হইও ইজল গাছ নদীর কূলে বাসা ।  
তোমার কাছে কইয়া গেলাম মনের যত আশা ॥  
এইখানে আসিব কন্যা সুন্দর আকার ।  
এই পত্র দেখাইও আমার সমাচার ॥  
অন্ধকারের সাক্ষী তোমারা চান্দ আর ভানু ।  
এইখানে আসিবে কন্যা সোনার বরণ তনু ॥

১ কণ্ঠস্বরে, ২ হিজল

সোণার বরণ তনু কন্যা চম্পকবরণী।  
তার কাছে কইও আমার দুঃখের কাহিনী ॥  
ফিরিয়া আসে জলের ঢেউ পারের কাছে খারা।  
এইখান বসিয়া আমি দেখিব পশরা ॥<sup>1</sup>  
ভাবিয়া চিন্তিয়া নাগর যুক্তি স্থির কৈল।  
কালি প্রাতে তুলতে ফুল পুষ্পবনে গেল ॥  
যে খান ফুট্যাছে ফুল মালতী-মল্লিকা।  
ফুট্যা আছে টগর-বেলি আর শফালিকা ॥  
হাতেতে ফুলের সাজি কপালে তিলক-ছটা।  
ফুল তুলিতে যায় কুমার মনে বিন্ধ্যা কাঁটা ॥<sup>2</sup>

### (১০) দুঃসংবাদ

তুল বাজে ডাগর বাজে জয়াদি জুকার।  
মালা গাথে কুলের নারী মঙ্গল আচার ॥  
এমন কালে দৈবেতে করিল কোন কাম।  
পাপেতে ডুবাইল নাগর চৈদ্দ পুরুষের নাম ॥  
কি হইল কি হইল কথা নানান জনে কয়।  
এই যে লোকের কথা প্রত্যয় না হয় ॥  
পুরীতে জুড়িয়া উঠে কান্দনের রোল।  
জাতিনাশ দেখ্যা ঠাকুর হইল উতরুল ॥<sup>3</sup>  
“কপালের দোষ, দোষ নহে বিধাতার।  
যে লেখা লেখ্যাছে বিধি কপালে আমার ॥

---

1 যেমন জলের ঢেউ খানিকটা অগ্রসর হইয়া পুনরায় ফিরিয়া আসে ও পারের নিকট দাঁড়ায়, সেই সুন্দরী কন্যাও জলের দিকে অগ্রসর হইয়া তীরে দাঁড়াইবে, 2 মনে সেই কন্যার জন্য ভালবাসা কাঁটার ন্যায় বিঁধিয়াছে, 3 উদ্ভিন্ন

মুনির হইল মতিভ্রম হাতীর খসে <sup>1</sup> পা ।  
ঘাটে আস্যা বিনা ঝরে ডুবে সাধুর না ॥”  
পাড়া-পড়সি কয় “ঠাকুর কইতে না জুয়ায় ।  
কি দিব <sup>2</sup> কন্যার বিয়া ঘটল বিষম দায় ॥  
অনাচার কেল জামাই অতি দুরাচার ।  
যবনী করিয়া বিয়া জাতি কৈল মার ॥”  
শিরেতে পড়িল বাজ মাঠের মাথায় ফোড় <sup>3</sup> ।  
পুরীর যত বাদ্যভাঙ সব হৈল দুর ॥  
ধুলায় বসিল ঠাকুর শিরে দিয়ে হাত ।  
বিনামেঘে হইল যেন শিরে বজ্রাঘাত ॥

### (১১) চন্দ্রার অবস্থা

“কি কর লো চন্দ্রাবতী ঘরেতে বসিয়া ।”  
সখিগণ কয় কথা নিকটে আসিয়া ॥  
শিরে হাত দিয়া সবে জুড়য়ে কান্দন ।  
শুনিয়া হইল চন্দ্রা পাথর যেমন ॥  
না কান্দে না হাসে চন্দ্রা নাহি বলে বাণী ।  
আছিল সুন্দরী কন্যা হইল পাষণী ॥  
মনেতে ঢাকিয়া রাখে মনের আগুনে ।  
জানিতে না দেয় কন্যা জল্যা মরে মনে ॥  
এক দিন দুই দিন তিন দিন যায় ।  
পাতেতে রাখিয়া কন্যা কিছু নাহি খায় ॥

---

<sup>1</sup> স্থলিত হয়, <sup>2</sup> দেবে, <sup>3</sup> মন্দিরের উচ্চশিরে পোঁড় (ছিদ্র) হইল

রাত্রিকালে শর-শয্যা বহে চক্ষের পানি ।  
বালিস ভিজিয়া ভিজে নেতের বিছানি ॥  
শৈশবের যত কথা আর ফুলতুলা ।  
নদীর কূলেতে গিয়ে করে জলখেলা ॥  
সেই হাসি সেই কথা সদা পড়ে মনে ।  
ঘুমাইলে দেখিব কন্যা তাহারে স্বপনে ॥  
নয়নে না আসে নিদ্রা অঘুমে রজনী ।  
ভোর হইতে উঠে কন্যা যেমন পাগলিনী ॥  
বাপেত বুঝিল তবে কন্যার মনের কথা ।  
কন্যার লাগিয়া বাপের হইল মমতা ॥  
সম্বন্ধ আসিল বড় নানা দেশ হইতে ।  
একে একে বংশীদাস লাগে বিচারিতে ॥  
চন্দ্রাবতী বলে “পিতা, মম বাক্য ধর ।  
জন্মে না করিব বিয়া রইব আইবর ॥  
শিবপূজা করি আমি শিবপদে মতি ।  
দুঃখিনীর কথা রাখ ধর অনুমতি ॥”  
অনুমতি দিয়া পিতা কয় কন্যার স্থানে ।  
“শিবপূজা কর আর লেখ রামায়ণে” ॥<sup>1</sup>

## (১২) শেষ

নির্ম্মাইয়া পাষণশিলা বানাইলা মন্দির ।  
শিবপূজা করে কন্যা মন করি স্থির ॥  
অবসরকালে কন্যা লেখে রামায়ণ ।  
যাহারে পড়িলে পাপ হয় বিমোচন ॥

---

<sup>1</sup> চন্দ্রাবতীর রামায়ণ মুদ্রিত হয় নাই, কিন্তু তাহার পাণ্ডুলিপি কলিকাতা বিশ্ববিদ্যালয়ের পুস্তকাগারে আছে ।

জন্মাথ<sup>1</sup> থাকিব কন্যা কুলের কুমারী।  
একনিষ্ট হইয়া পূজে দেব ত্রিপুরারী ॥  
শুধাইলে না কয় কথা মুখে নাহি হাসি।  
একরাত্রে ফুটা ফুল ঝুইরা<sup>2</sup> হইল বাসি ॥  
এমন কালেতে শুন হইল কোন কাম।  
যোগাসনে বৈসে কন্যা লইয়া শিবের নাম ॥  
বম্ বম্ ভোলানাথ গাল-বাদ্য করি।  
বিহিত আচারে পূজে দেব ত্রিপুরারী ॥  
বৈশাখ মাসেতে হয় রবি খরতর।  
গাছেতে পাকিল আম অতি সুবিস্তর ॥  
বারতা লইয়া আসে পত্রে ছিল লেখা।  
চন্দ্রাবতী সঞ্জেতে করিতে আইল দেখা ॥  
এই পত্রে লিখিয়াছে দুঃখের ভারতী।  
জয়ানন্দ দিছে পত্র শুন চন্দ্রাবতী ॥  
পত্রে পড়িল কন্যা সকল বারতা।  
পত্রেতে লেখ্যাছে নাগর মনের দুঃখকথা ॥  
“শুনরে প্রাণের চন্দ্রা তোমারে জানাই।  
মনের আগুনে দেহ পুড়্যা হইছে ছাই ॥  
অমৃত ভাবিয়া আমি খাইয়াছি গরল।  
কণ্ঠেতে লাগিয়া রইছে কাল-হলাহল ॥  
জানিয়া ফুলের মালা কালসাপ গলে।  
মরণে ডাকিয়া আমি আন্যাছি অকালে ॥  
তুলসী ছাড়িয়া আমি পূজিলাম সেওরা।  
আপনি মাথায় লইলাম দুঃখের পসরা ॥

---

1 আজন্ম আইবড়, 2 ঝরিয়া

জলে বিষ বাতাসে বিষ না দেখি উপায়।  
ক্ষমা কর চন্দ্রাবতী ধরি তোমার পায় ॥  
একবার দেখিব তোমায় জন্মশেষ দেখা।  
একবার দেখিব তোমার নয়নভঙ্গি বাঁকা ॥  
একবার শুনিব তোমার মধুরসবানী।  
নয়নজলে ভিজাইব রাঙা পা দুইখানি ॥  
না ছুঁইব না ধরিব দূরে থাক্যা খাড়া।  
পুণ্যমুখ দেখ্যা আমি জুড়াইব অন্তরা<sup>1</sup> ॥  
শিশুকালের সঙ্গী তুমি যৈবনকালের মালা।  
তোমারে দেখিতে কন্যা মন হইল উতলা ॥  
জলে ডুবি বিষ খাই গলাই দেই দড়ি।  
তিলেক দাড়াইয়া তোমার চান্দমুখ হেরি ॥  
ভাল নাহি বাস কন্যা এই পাপিষ্ট জনে।  
জন্মের মতন হইলাম বিদায় ধরিয়া চরণে ॥  
এই দেখা চক্ষের দেখা এই দেখা শেষ।  
সংসারে নাহিক আমার সুখশান্তির লেশ ॥  
একবার দেখিয়া তোমায় ছাড়িব সংসার।  
কপালে লেখ্যাছে বিধি মরণ আমার ॥”  
পত্র পড়ি চন্দ্রাবতী চক্ষের জলে ভাসে।  
শিশুকালের স্বপ্নের কথা মনের মধ্যে আসে ॥  
এক বার দুই বার তিন বার করি।  
পত্র পড়ে চন্দ্রাবতী নিজ নাম স্মরি ॥  
নয়নের জলে কন্যার অক্ষর মুছিল।  
এক বার দুই বার পত্র যে পড়িল ॥  
“শুন শুন বাপ আগো শুন মোর কথা।  
তুমি সে বুঝিবে আমি দুঃখিনীর ব্যথা ॥

---

1 অন্তর, হৃদয়

জয়ানন্দ লেখে পত্র আমার গোচরে ।  
তিলেকের লাগ্যা চায় দেখিতে আমারে ॥”  
“শুন গো প্রাণের কন্যা আমার কথা ধর ।  
একমনে পূজ তুমি দেব বিশ্বেশ্বর ॥  
অন্য কথা স্থান কন্যা নাহি দিও মনে ।  
জীবন মরণ হইল যাহার কারণে ॥  
নষ্ট হইল পূজার ফুল ছুইল যবনে ।  
না লাগে উচ্ছিষ্ট ফল দেবের কারণে ॥  
আছিল গঙ্গার জল অপবিত্র হইল ।  
বিধাতা সাধিছে বাধ সব নষ্ট হইল ॥  
তুমি যা লইছ মাগো সেই কাজ কর ।  
অন্য চিন্তা মনে স্থান নাহি দিও আর ॥”  
পত্র লিখি চন্দ্রাবতী জয়ের গোচরে ।  
পুষ্পদূর্ধ্বা লইয়া কন্যা পশিল মন্দিরে ॥  
যোগাসনে বসে কন্যা নয়ন মুদিয়া ।  
একমনে করে পূজা ফুলবিষ্ম দিয়া ॥  
শুখাইল আঁখির জল সর্ব চিন্তা দুরে ।  
একমনে পূজে কন্যা অনাদি শঙ্করে ॥  
কিসের সংসার কিসের বাস কেবা পিতামাতা ।  
পূজিতে ভুলিল কন্যা শৈশবের কথা ॥  
জয়ানন্দে ভুলি কন্যা পূজয়ে শঙ্করে ।  
একমনে ভাবে কন্যা হর বিশ্বেশ্বরে ॥  
শান্তিতে আছয়ে কন্যা একনিষ্ঠ হইয়া ।  
আসিল পাগল জয়া শিকল ছিড়িয়া ॥  
“দ্বার খোল চন্দ্রাবতী তোমারে শুধাই ।  
জীবনের শেষ তোমায় একবার দেখ্যা যাই ॥

আর না দেখিব তোমায় নয়ন চাহিয়া ।  
 দোষ ক্ষমা কর কন্যা শেষ বিদায় দিয়া ॥”  
 কপাটে আঘাত করে শিরে দিয়া হাত ।  
 বজ্রের সমান করে বুকতে নির্ঘাত ॥  
 যোগাসনে আছে কন্যা সমাধিশয়নে ।  
 বাহিরের কথা কিছু নাহি পশে কানে ॥  
 পাগল হইয়া নাগর কোন কাম করে ।  
 চারি দিকে চাইয়া দেখে নাহি দেখে কারে ॥  
 না খোলে মন্দিরের কপাট নাহি কয় কথা ।  
 মনেতে লাগিল যেমন শক্তিশেলের ব্যথা ॥  
 পাগল হইল জয়ানন্দ ডাকে উচ্চৈশ্বরে ।  
 “দ্বার খোল চন্দ্রাবতী দেখা দেও আমারে ॥  
 না ছুইব না ধরিব দূরে থাক্যা খাড়া ।  
 ইহজন্মের মতন কন্যা দেও মোরে সাড়া ॥  
 দেবপূজার ফুল তুমি তুমি গঞ্জার পানি ।  
 আমি যদি ছুই কন্যা হইবা পাতকিনী ॥  
 নয়ন ভরে দেখ্যা যাই জন্মশোধ দেখা ।  
 শৈশবের নয়ান দেখি নয়ানভঞ্জি বাকা ॥”  
 না খোলে মন্দিরের দ্বার মুখে নাহি বাণী ।  
 ভিতরে আছে কন্যা যৈবনে যোগিনী ॥  
 চারি দিকে চাইয়া নাগর কিছু নাহি পায় ।  
 ফুট্যাছে মালতীফুল সামনে দেখতে পায় ॥  
 পুষ্প না তুলিয়া নাগর কোন কাম করে ।  
 লিখিল বিদায়পত্র কপাটের উপরে ॥  
 “শৈশবকালের সঙ্গী তুমি যৈবনকালের সাথী ।  
 অপরাধ ক্ষমা কর তুমি চন্দ্রাবতী ॥  
 পাপিষ্ঠ জানিয়া মোরে না হইলা সম্মত  
 বিদায় মাগি চন্দ্রাবতী জনমের মত ॥”



ধ্যান ভাঙ্গি চন্দ্রাবতী চারিদিকে চায় ।  
নির্জন অঙ্গন নাহি কারে দেখতে পায় ॥  
খুলিয়া মন্দিরের দ্বার হইল বাহির ।  
\* \* \* \* \*  
কপাটে আছিল লেখা পড়ে চন্দ্রাবতী ।  
অপবিত্র হইল মন্দির হইল অধোগতি ॥  
কলসী লইয়া জলের ঘাটে করিল গমন ।  
করিতে নদীর জলে স্নানাদি তর্পণ ॥  
জলে গেল চন্দ্রাবতী চক্ষে বহে পানি ।  
হেনকালে দেখে নদী ধরিছে উজানী <sup>1</sup> ॥  
একেলা জলের ঘাটে সঞ্জে নাহি কেহও ।  
জলের উপরে ভাসে জয়ানন্দের দেহ ॥  
দেখিতে সুন্দর নাগর চান্দের সমান ।  
টেউয়ের উপর ভাসে পুন্মাসীর চান ॥  
আখিতে পলক নাহি মুখে নাই সে বাণী ।  
পারেতে খাড়াইয়া <sup>2</sup> দেখে উমেদা <sup>3</sup> কামিনী ॥  
স্বপ্নের হাসি স্বপ্নের কান্দন নয়ান্ চান্দে গায় ।  
নিজের অন্তরের দুষ্ক <sup>4</sup> পরকে বুঝান দায় ॥

(দীনেশচন্দ্র সেন-এর ময়মনসিংহ গীতিকা থেকে নেওয়া)

সুদীপ্ত মুখার্জি, ইন্সটিটিউট অফ ফিসিক্স।

<sup>1</sup>উজান বাহিয়া চলিয়াছে, <sup>2</sup> দাঁড়াইয়া, <sup>3</sup> উন্মত্ত, <sup>4</sup> দুঃখ